

ILLVSTRISSIMO PRINCIPI
AC DOMINO, DOMINO ALBERTO MAR-
chioni Brandenburgensi, Duci Prussiae, Stetini, & Pomeraniae &c. Burggrauio
Noribergensi, Domino suo clementissimo, ERASMVS REINHOLT
Salueldensis, Mathematum Professor.

S. D.

 Vanquam hæc admiranda sapientia, quam doctrina de numeris, proportionibus, figuris, mensuris, & motibus cœlestibus continet, nulla humana voce satis laudari potest, tamen in alijs libris, qui ad usum discentium initia Mathematum editi sunt, prolixius de dignitate & utilitate harum artium dixi, ut iuniorum studia utcunq; accenderentur, seu certè, ut præmuntantur iuniores contra Cyclopicos sermones eorum, qui has artes stolidissimè contemnunt, nec vident eas esse & sapientiæ diuinæ radios transfusos in hominum mentes, & illustria ac firma testimonia de Deo, & de prouidentia, & necessaria vita adminicula. Necesse est enim, & propter gloriam Dei, & propter utilitates ingentes communis vitæ, extare de his tantis bonis, veras commonefactiones, & constantissimè reprehendi furores eorum, qui cum hanc doctrinam aspernantur, simul Deum contumelia adficiunt, & nocent communi hominum vitæ. Sed quia hoc opus non editur tyronibus, hic omissa illa commemoratione, tantum gratias agam, primùm Deo autori & conseruatori harum artium, deinde & tibi Princeps ALBERTE, qui & hanc doctrinam propagari curas, & nosstros labores tua liberalitate adiuvas. Itaq; ut honorem debitum Deo tribuam, adfirmo id quod verissimum est, totam hanc sapientiam, doctrinam numerorum, mensurarum ac motuum cœlestium, lucem esse diuinitùs sparsam in hominum mentes, ut ostendat hunc mundum non casu ex Democriti Atomis conflatum esse, sed architectricem esse, mentem æternam, iustum, & beneficam, & ut ingentes vitæ utilitates adferat. Adfirmo etiam Dei ope inter tantas imperiorum ruinas & barbaricas confusiones, non humana diligentia, sed diuinitùs has artes conservatas, & subinde restitutas, & illustratas esse. Hæc Dei beneficia grato pectore celebro, & eum oro, ne sinat hæc sapientiam in genere hu[m]ano extingui. Eò etiam facilius hunc magnum laborem, in docendo,
& in